

6. MADAHATN YESUS DIMARANAKATN: LEMAE DIRI' NARIMA' KABAR NANG GAGAS KOA

TEKS : LUKAS 2:1-20

¹ Ina' lama laka' Yohanes Pamaptis dimaranakatn, Kaisar Agustus mare' parentah ka' sigana urakng nang ka' nagari karajaan Roma, arus naptaratn diri'nya untu' sensus. ² Sensus nang pamulaatn nian dinyalanan wa'tu Kirenius jaji gubernur ka' propinsi Siria. ³ Tagal koa sigana urakng pulakng ka' kampokng asal ene' uyutnya untu' naptaratn diri'nya.

⁴ Leko' uga' Yusup, ia badiapm ka' kota Nasaret ka' wilayah Galilea, mpat ka' Nasaret ia berangkat ka' wilayah Yudea. Ia ampus ka' kota Betlehem, tempat Raja Daut dimaranakatn, barang Yusup koa katurunan Raja Daut uga'. ⁵ Yusup ampus untu' naptaratn diri'nya barage man Maria tunangannya nang gi' tagah babuntikng. ⁶ Taka' nyadua ka' Betlehem dah namus arinya Maria baranaka'. ⁷ Ia maranakatn kamuda' nanglaki anaknya nang tuha. Kamuda' koa nya mungkus man paca'. Dah koa nya nguringan ka' dalapm dulakng nang baisi' aruman, barang nyadua koa nana' namu tempat untu' badiapm.

⁸ Malam koa ada panyaga-panyaga domba nang gi' tagah nyaga domba-domba pihara'atnnya ka' padang barumput nang ka' samak Betlehem. ⁹ Tiba-tiba malaekat Tuhan Allah nele'atn diri'nya kana' panyaga-panyaga domba ka' koa, man saho nang tarakng mpat ka' Tuhan Allah narakngi' ia ka' koa, ia ka' koa sidi kagali'an. ¹⁰ Kahe mpakoa, malaekat Tuhan Allah koa da' bakata, "Ame gali'! Jukut aku atakng nyampeatn Kabar nang Gagas untu' kita', kabar nang sidi miah ngarepoatn sigana urakng. ¹¹ Ari nian ka' kota Raja Daut dah dimaranakatn Raja nang nyalamatatnna' kita' Ia koa Karistus, Tuhan. ¹² Nianboh tandanya: Kita' namuia' Kamuda' nang dimungkus man paca', nang dinguringan ka' dalapm dulakng."

¹³ Tiba-tiba da' katele'atn sidi miah banyak malaekat nang lain barage man malaekat koa muji Tuhan Allah. Jakatanya,

¹⁴ "Dipujilah Tuhan Allah nang ka' saruga!

Kira'nya baati nang dame sigana talino nang ka' ai' tanah, nang di Tuhan Allah nyukai!"

¹⁵ Laka' malaekat-malaekat Tuhan ningalatn ia ka' koa pulakng ka' saruga, panyaga domba ka' koa bakata ka' sabayaanannya, "Inje' diri' ka' Betlehem nele' ahe nang dah jaji koa nang di Tuhan Allah madahatn ka' diri'."

¹⁶ Ia ka' koa da' ampus ka' Betlehem, ngago'ia' Kamuda' koa. Baru' ia ka' koa batamu Maria man Yusup, man uga' Kamuda' nang dinguringan ka' dalapm dulakng koa.

¹⁷ Taka' na' panyaga domba nele' Kamuda' koa, ia ka' koa ngesahatn ahe nang di malaekat Tuhan Allah matakatn nganai' Kamuda' koa. ¹⁸ Man sigana urakng nang ada di'koa, jaji kaheranan nangar gesah na' panyaga domba ka' koa. ¹⁹ Tapi Maria norohi' sigana ahe nang dah jaji koa ka' dalapm atinya lantasi mikiri'nya. ²⁰ Panyaga-panyaga domba ka' koa mulakng ka' padang rumput sirage muji ka' Tuhan Allah, barang sigana nang dah nya nele' man nya nangar koa pas lea nang di malaekat Tuhan Allah madahatn ka' ia ka' koa.

PAMULAATN

Salama baratus tahutn, urakng Israel nganti'atn kaatangan saurakng Raja nang uga dinyabut "Mesias" ato "Karisus". Nabi-nabi dah madahatn kade' Ia koa asal-Nya mpat dari katurunan Raja Daut nang dimaranakatn ka' Bethlehem. Ia diutusa' untu' nyalamataatn umat Tuhan Allah man karajaannya ina' barujuknga'. Tapi wa'tu Raja nian atakng, Ia atakng jaji kamuda' enek nang

di nguringan ka' dalapm dulakng. Dalapm kaadaan ahe adanya man ka' antara urakng nang ina' dipandang ka' masyarakat, malaekat-malaekat Tuhan Allah nyampeatn kabar gagas nang sisi luar biasa. Ia ka' koa mare' nau'an kade' Karistus Raja nang di nyanjiatn, dah atakng. Man kabar gagas nian untu' sigana urakng. Tapi ina' sigana urakng nang mao' narima kabar gagas koa. Ahe nang nantuatn kade' urakng narima ato ge' ina narima kabar gagas tentang Yesus? Lemae sikap kita' babaro ka' kabar gagas koa?

NANG DITALITI

- Parentah ahe nang di Kaisar Agustus ngaluaratn? Ahe tujuannya? (ayat 1-3)
- Ngahe Yusup man Maria ampus ka' Bethlehem? (ayat 4-5)
- Lemae kaadaan nyadua koa ka' Bethlehem wa'tu Yesus dimaranakatn? (ayat 6-7)
- Ahe nang di malaekat koa nyampeatn ka' na' panyaga domba? (ayat 10-14)
- Sae ja' urakng-urakng nang ada ka' dalapm gesah nian? Ahe ja' tanggapannya ka' koa ka' gesah Yesus dimaranakatn? (ayat 1-20)

NGAGOT' MA'NANYA

- Ka' jaman Yesus, nang bakaraja jaji panyaga domba dinganggap nana' barati jukut urakng nang nyaga domba koa dinganggap kotor man ina' jujur. Kira-kira, ngahe Tuhan Allah milih na' panyaga domba ka' koa untu' jaji saksi pamulaatn wa'tu Yesus dimaranakatn?
- Ada talu galar nang dibare' ka' Yesus dalapm 2:11: "Raja nang nyalamatatnna' kita'," "Tuhan," man "Karisutus." Ahe nang diri' palajari tentang ciri-ciri Yesus dari galar-galar nian?
- Kira-kira lemae kaatangan Yesus jaji talino ngincakng "baati nang dame [ka'] sigana talino nang ka' ai' tanah, nang di Tuhan Allah nyukai'?"

PENERAPAN

- Dari tanggapan urakng-urakng ka' kabar baik tentang kelahiran Yesus ada nang kagum, ada nang karepoatn, ada nang penasaran, ada nang muji Tuhan Allah. Ada uga' nang langsung ngesahatn gesah koa ka' urakng lain, ada nang mikiri' ka' dalapm atinya tentang gesah koa. Lemae tanggapan diri' ka' kabar nang gagas tentang kabar Yesus koa? ahe nang sama man urakng-urakng ka' gesah nian. Ahe bedanya?
- Ahe ge' sodara kala' marasa kade' Tuhan Allah ada banar-banar sama-sama man sodara? Ahe nang manjawat sodara marasa lekoa? Gesahatn pangalaman koa.

BATUKAR PANDAPAT

- Ngahe Tuhan Allah ngutus Anaknya, Raja nang dinyanjiatn koa ka' dunia dalapm kaadaan sisi sederhana? Man cara nian, ahe nang di Nya mau tojokatn ka' diri' tentang lemae Tuhan Allah marentah jaji raja?

NANG ARUS DIPANJAWAT

- Pake wa'tu paling sabebet 20 menit untu' mikiri hal-hal nang luar biasa nang kala' di Tuhan Allah panjawat ka' dalapm idup diri'. Torohi sigananya koa ka' dalapm ati.

DOA

Panyaga domba nang dah narima kabar nang gagas man karepoatn muji Tuhan Allah, man ngesahatn sigananya koa ka' urakng lain. Minta ka' Tuhan Allah biar diri nanggapi kabar nang gagas man cara nang sama.